





中州集卷第四

常山周先生昂 一百首

昂字德卿真定人父伯祿字天錫師事玄

真先生褚承亮

承亮字茂先宣和六年擢第調易州戶曹會皇子郎

君破真定拘境內進士七十二人赴安國寺試策策目上皇不道少主失信舉人希

旨極口毀詆茂先離席揖王文劉侍中言君父之過宣臣子所當言長揖而出劉為

之動容比榻除茂先被黜餘悉放第狀元許必輩自號七十二賢榻帥府重其名檄

茂先以易州司戶知橐城漫一應之尋大解印去年七十終第子謚為玄真先生

定初第進士仕至同知沁南軍節度使事  
德卿年二十一擢第釋褐南和簿有異政  
遷良鄉令入拜監察御史路宣叔以言事  
被斥德卿送以詩坐謫訕停銓久之起爲  
龍州都軍以邊功得復召超三司判官大  
安軍興權行六部員外郎德卿傳其甥王  
從之文法云文章工於外而拙於內者可  
以驚四筵而不可以適獨坐可以取口稱

而不可以得首肯又云文章以意爲主以  
字語爲役主強而役弱則無令不從今人  
往往驕其所役至跋扈難制甚者反役其  
主雖極辭語之工而豈文之正哉德卿初  
有常山集喪亂後不復見從之能記三百  
餘首因得傳之屏山故人外傳云德卿以  
孝友聞又喜名節藹然仁義人也學術醇  
正文筆高雅以杜子美韓退之爲法諸儒

皆師尊之既歷臺省爲人所擠竟坐詩得罪謫東海上十數年始入翰林言事愈切出佐三司非所好從宗室承裕軍承裕失利跳走上谷衆欲逕歸德鄉獨不可城陷與其從子嗣明同死於難嗣明字晦之短小精悍有古俠士風年未三十交游半天下識高而志大善談論而中節作詩喜簡澹樂府尤溫麗最長於義理之學下筆數

千言初不見其所從來試於府於禮部俱第一擢第三涑水簿從其叔址征得還而不忍去使晦之不死文字不及其叔而理性當過之嘗謂學不至邵康節程伊川非儒者也其說類此而天不假年悲夫

### 晚望

烟抹平林水退沙碧山西畔夕陽家無人解得詩人意只有雲邊數點鴉

香山

山林朝市兩茫然紅葉黃花自一川  
野水趁人如有約長松閱世不知年  
千篇未暇償詩債一鉢聊從結淨緣  
欲問安心心已了手書誰識是生前

有感

壯心未分逐流年衰鬢從渠衆目憐  
却恨詩情消減盡語言枯淡到中邊

冷巖行賦冷巖相公所居

冷巖賢宰相宗室永貞自號也

或爲孟或爲鍾人心自異山本同  
天清雲遠望不極小孤宛在江流中  
澗之毛可筐筥山之木可斤斧唯有  
白雪高崔嵬風吹不消自太古峴山  
何竒羊子所攀東山何秀謝公往還  
今爾胡爲藉甚乎人間于嗟乎冷山

早起

覆斗臨霜閣號鍾滿夜城飛揚他日  
事去住此時情文字工番滯塵沙管  
送迎百年今已半凜凜畏

虛生

曉望

曉樹雲重隱春城日半陰  
蒼茫塵土眼恍惚歲時  
心流落隨南北才華閱古今  
柴荆生事窄寧憶二  
疎金

羈旅

羈旅情方慘暄寒氣尚膠  
谷風連遠陣原樹鬱春  
梢要路嗟何及浮名久已拋  
百年麤飯在真欲事

誅茅

早春

小雪寒仍在烟花意已深  
老侵長路鬢春蕩故園  
心幸可追沂詠何勞費越吟  
微躬應自愛莫作愧  
千金

雪

小雪暮能繁愁雲久更昏  
細燈寒出戶欹樹老當  
軒竹葉舊時釀梅花何處村  
賦詩空入夜愁絕與

誰論

雨過

雨暎高簷過山開晚日明動雲方潰擁號水未休  
爭沙岸黿鼉出荒庭鶴鶴行草泥沾屐齒杖策有  
餘清

晚步

鬱鬱孤城隘飄飄絕塞游短衣忘遠步高興會清  
秋白水深樵谷黃雲古戍樓居人半裘毯橫管莫

十愁

夜

門巷溪聲爽衣裳夜氣蘇地清林影散月靜桂花  
孤左省詩頻詠南樓興不辜關山冰雪裏何處覓  
天隅

晚望

疊嶂何時出荒城落日低音書雲去北烽燧客愁  
西鷹隼乘秋擊狐狸倚暮啼吟詩且排悶佳句敢

攀躋

獨酌

渺渺清溪濶悠悠弱藻沈  
客衣臨水靜鳥影過船  
深暫把魚竿坐因知靜者心  
滄洲高興動巢父可  
東尋

秋夜

高閣鍾初殷層城月未光  
淨空含宇大卧斗帶星  
長暗覺巢鳥動清聞露菊香  
誰家砧杵急應怯暮

天涼

對月

月近天河白秋深夜氣清  
蛛絲時隱見兔杵正分  
明歌帽中宵落孤舟幾處行  
清風殊未發樹穩鵲  
休驚

促織

促織來何處秋風暗與期  
苦吟人不解多恨爾如  
知獨枕難安夜寒衣欲及時  
凌晨攬清鏡一半已



成絲

溪南

小徑通沙穩清溪帶樹深岸危低白屋雲近沒青  
岑洒落高秋氣飛騰志士心雲臺與麟閣莫遣二  
毛侵

繼人韻

高興秋方逸幽居晚見過歡交寧馱數詩好不論  
多五字含風雅千篇費琢磨自知才力拙相報欲

如何

送李天英下第

不須寂寞恨東歸洗眼三年看一飛試捲波瀾入  
毫穎莫教歐九識劉幾

宿西藍

聞道西藍好能來定有緣青山避高木流水信平  
田步屨迷深竹題詩惜算煙塵心厭翻倒一室暫  
安禪

北湖清明

碧水隨時酒春風著處花歡娛萬國本富貴五侯  
家金動樓頭管香迴日莫車老夫唯欲睡兒女莫  
相誇

中秋夜高陽對月

端正高陽月空庭又見過清風禁睡得白髮奈愁  
何尚識王良策難知織女梭金波流汨汨應爲照  
滹池

丘家庄早發

渡馬危橋立村雞暗樹號星稀白水濶霧重黑山  
高外物誰能必人生會有勞鷗鵬終變化早晚借  
風濤

邊月

邊月弓初滿山城角尚孤中天看獨立永夜興誰  
俱未覺風生暈空懷斗轉隅含情知白兔欲下更  
踟躕

侍祠太室

設燎彤庭敞懸燈玉殿深  
星河含爽朗城闢動陰  
沈祗慄誠初薦馨香德已歆  
清風動雲幕有喜見  
神心

夜步

擊柝隣居靜開門宿鳥驚  
西風秋半急北斗夜深  
明獨立乾坤大徐行杖屨輕  
遙怜漢宮闢重露濕  
金莖

宋文貞公廟

開元四荒不動塵柱石中原有  
老臣襄土一丘松  
柏暗長安三日荔枝新

讀陳後山詩

子美神功接混茫人間無路可升堂  
一斑管內時  
時見賺得陳郎兩鬢蒼

偶書

幽陰不放終年樹好味仍餘盡日茶  
詩業未降心

有種世緣初盡眼無花

失子

白髮飄蕭老病身幾因兒女淚沾巾  
虛談誤世王夷甫只有情鍾語最真

北行即事二絕句

聞道崑崙北風塵避僕窪至今悲漢節不合度流

沙

又

五月分衣節三軍受甲時莫教麟閣將頻發羽林  
兒

邊月

驅車宿雙浦極目耿金波不有中秋景其如永夜  
何沙分疑白雪練失想明河桂樹元無意南傾獨  
好柯

晨起

鼓聲隨曉角合沓起平荒宿火連岡小寒星隋水

長鯨翻驚日動馬食快宵涼白首登壇將功名好  
自強

西城道中

草路幽香不動塵細蟬初向葉間聞  
溟濛小雨來無際雲與青山淡不分

醉經齋爲虞鄉麻長官賦

詩書讀破自融神不羨雲安麴米春黃卷至今真  
味在莫將糟粕待前人

清放齋

平生眼白嫌物俗此身誰要冠帶束茶甌飯飽一  
飲足卧聽松風仰看屋

孫資深歲寒堂

世態浮雲日夜移春蘭秋菊各爭時此心鐵石無  
人會唯有庭前柏樹知

登綿山上方

環合青峰插劍長小平如掌寄禪房危闌半出雲

中州集 十一  
霄上祕景盡收天地歲野濶群山驚破碎雲低滄  
海認微茫九華籍甚因人顯迴秀可憐天一方

謁先王廟

暗粉陳丹半在亡短垣殘日共悲涼不須古碣書  
綿竹自有荒村紀葆桑塵土衣冠曾繫馬歲時歌  
舞亦稱觴不應巴蜀江山麗能使英靈忘故鄉

送客

相見席不暖送行情更牽只愁人面隔不放馬蹄

前塞迴雲垂地溪平水接天山川後期濶把臂兩  
茫然

莫州道中

大陵河東古莫州居人小屋如蝸牛屋邊向外何  
所有唯見白沙纍纍堆山丘車行沙中如倒拽風  
驚沙流失前轍馬蹄半跛牛領穿三步停鞭五步  
歇雞聲人語無四鄰晚風蕭蕭愁殺人人有禱沙  
應神遼東老兵非使臣何必埋却雙行輪

即事二韻

憂患年來坐讀書田園拋却任荒蕪  
目前却得晨昏力碌碌無由似阿奴

又

遠目傷心千里餘凜然真覺近狼須  
雲邊處處是青塚馬上人人皆白鬚  
正憶荒村臨古道不堪獨樹點平蕪  
誰人與話西園路梅竹而今似画图

感秋

秋氣入行帳愁人中夜知雞聲與人語  
耿耿異常時清晨起危坐感歎不自持  
義和馭飛轂往返無停期春草如昨日  
已復悲離離願謂鏡中髮爾衰安得遲  
結束媚鞍馬荒山去委蛇黃花泣宵露  
綠野含晨曦吾事久不諧悠悠隨所之  
有懷南澗約敢賦北山詩

對月

月滿秋仍早臺高夜未徂水光先剡淡  
星影失踟

平蕪  
躑玉帳傳更急荒城擊柝孤去年雙淚眼依舊入

平蕪  
鵲山

西征疲短服北望慘衰顏再宿殊雞舍相看獨鵲  
山旆沾新雨過鳥逐暮雲還白首瞻星漢何時鼓  
角閒

望山中松

地險蟠根古人稀小徑消雨斂開白雪風響入青

霄未畏斧斤逼惟愁霹靂燒解鞍那避遠冷色故  
相招

利涉道中寄子端

行武昌望利涉高青烟低白雪岡陵瀰漫溝澮滅  
氤氳冷日從東來照我清影忽作溪水卧明月凌  
兢羸馬蝟毛縮詰曲微行蛇腹裂遺鞭脫鏡初不  
知指僵欲隨骨欲折羶裘毛襪良可念我自無備  
誰從輟人家土榻借微暖坐久清冰落鬚頰黃花



矐仙怯風馭久向笙歌窟中蟄徑須持此遠相餉  
一洗夜堂花酒熟

即事二韻

不堪華髮半頭生老去偏添愛嫫情新得家書來  
報喜舊時龜子遶床行

又

一床安置似僧居白髮忘梳動月餘懶性漸成愁  
把筆小詩常擬倩人書

此後九日

不堪馬上逢佳節況是天涯望故鄉高會未容陪  
戲馬舊游空復憶臨香癡雲黯黯方垂地小雪霏  
霏欲度墻猶賴多情數枝菊肯畱金蕊待重陽

對月

萬里寥天月相隨不憚勞屢添華髮滿曾傷黑山  
高影動新瓊杵光含舊寶刀常娥應見訝獨宿樊  
縑袍

翠屏口七首

去歲翠屏下東流看湧波愁將新鬢髮還對舊關  
河翅健翻秋隼峰高並晚馳草深饒虎跡夜黑欲  
誰過

又  
地擁河山壯營關劍甲重馬牛來細路燈火出寒  
松刁斗方巖夜羔裘欲禦冬可憐天設險不入漢  
提封

又

玉帳初鳴鼓金鞍半偃弓傷心看寒水對面隔華  
風山去何時斲雲來本自通不須驚異域曾在版

圖中

又

野蔓抽馳架輕泥濺馬鞍徑斜來險石溪急上清  
灘羽檄千山靜羔裘六月寒長松空夾道蕭颯不  
成看

又

旌節瞻前帳風塵識舊坡  
眼平青草短情亂碧山  
多晚起方投筆前驅効  
執戈馬蹄須愛惜留渡北  
流河

又

萬里來崩豁終年氣慘悽  
地窮青澗斷天近玉繩  
低孛窟黃沙北崑崙白雪西  
故園何處覓搔首意  
空迷

又

塞古秋風早山昏落日低  
積雲鴉度以荒岸馬歸  
齊燈火看時出茅茨漸欲  
迷塵沙恨于役况乃對  
雞栖

邊俗

返闔看平野斜垣逐慢坡  
馬牛雖異域雞犬竟同  
窠木杵舂晨急糠燈照夜  
多淳風今已破征歛為  
兵戈

山家七首

秋日山田熟山家趣轉奇  
壠苞銀粟綴墻蔓綠雲  
垂野飯留佳客青錢付小兒  
主人愁喪亂數數問

邊陲

又

蕭颯晚風涼高杠引旆長  
嶺雲殘宿陣陵日湛晨  
光已作依劉表終須問葛疆  
俯身馳萬里未覺鬢

毛蒼

又

年深師欲老秋至敵還輕  
但使財思義猶多死易  
生指揮無險阻感激在精誠  
萬古麒麟閣何曾浪  
得名

又

簡易軍中事川原入望多  
草平鋪碧錦山遠出青  
螺遠愧桃花水重臨杏子河  
去年關塞意蕭颯起  
悲歌

又

赤磻蟠雙闌青山壯一門放歌遊遠目箕踞得高  
原地險勞天設邊戈厭日屯廟謀新控扼萬里可  
雄吞

又

官舍暫投轄塞垣還着鞭路移新歲月心醉好山  
川方丈何由到桃源恐浪傳相看不隔水遺恨惜  
他年

又

翡翠長松秀髣髴細草斑屢經新渡水不數舊看  
山太華愁登陟終南費引攀豈知圖画景長在馬  
蹄間

北行二首

卸鞍休馬倦解橐罷馳鳴細雨侵衣急長郊入卧  
平溪喧看水滿山黑厭雲生莫恠龍行數應知欲  
洗兵

比歲頻分甲今年賀息兵  
 競誇新戰士誰識舊書生  
 北塞甘長別南天欲遠征  
 二年迎復送空媿秦州城

山丹花

浪藥誰能記山丹舊所聞  
 萎花翻碧草低地落紅  
 雲塞雨沾衣久溪風入把  
 勤莫言羌婦醜誰識漢  
 昭君

春日即事

凍柳僵榆未改容  
 狐裘貂帽尚宜風  
 欲尋把酒渾無處  
 春在鳴鳩谷谷中

寄金山老

鬢凋庭前雙柏樹  
 作別似晨朝  
 書信隨溪茗  
 音聲落海潮  
 嶺雲開可翫  
 邊月苦無慘  
 相見愁他日  
 風沙雨鬢凋

寄王子明

病起身仍懶眠多意尚迷筆成今夕把書似隔年  
題久恨心期阻難邀物理齊燈花應解事岑寂向  
人低

無題

西風吹白水日暮動寒威野帳收旗盡奚兒飲馬  
歸梢梢聞鳥過慘慘見雲飛夜黑多豺虎荒村定  
敢依

萱草

萬里黃萱好風煙接路傍迹踈雖異域心密竟中  
典染練成初色移瓶得細香客愁無路遣始爲看  
花忘

得家書

窮愁非昔境白髮有深根淚破孤城郡書來萬里  
村鴈聲寒日夜秋色老乾坤爲問遊方子何時慰  
倚門

書齋

夜雨書齋冷西風木葉拋暗蛩侵壞壁低鴈落寒  
郊壯志初嘗膽吾生豈繫匏草玄雖閉戶未用客  
相嘲

聞蟬

冥機辭委蛻天籟發幽嘶迴露增晨洗清風借晚  
携暫成千里隔還作一枝低客思饒相觸愁時故  
不齊

晚陰不成

落日明西極高雲暗朔方樓臺分照耀宇宙一蒼  
茫不借蛟龍便虛成燕雀忙何須遣雷怒鬱鬱繞  
高梁

竇氏園亭二首

雲樹春秋色風泉日夜聲過庭高幕暗吹簟轉雷  
驚翠袖擎詩罷銀壺得酒傾平生耽野趣到此眼  
偏明

又



磴鑿蒼崖破池通碧澗流憩深怜洞室吟穩憶扁  
舟谷口堪高隱河梁厭遠遊卜居真此地幽寂更  
何求

即事二首

南苑霓旌動繚牆天街蓮燭照脩廊斗南絳氣風  
吹盡小雨濛濛濕建章

又

楊花顛倒入簾櫳睡鴨香殘碧霧空盡日尋詩尋

不得鶉鴉聲在夢魂中

代書寄大元伯

南園轔蟻記同傾一紙書來萬里情日夜愁心隨  
柳色東風吹滿大梁城

和路宣叔梅

月底明肌粲壽陽道人呼入竹西堂安排臘味千  
鍾酒消破春風萬斛香花鳥有情應見惜蛾眉傾  
國故難藏西湖骨朽東坡遠又爲君詩惱一場

新秋

畏日經時暑清秋一夕涼真堪近燈火不復病衣  
裳宋玉悲搖落安仁愧老蒼鄙夫那及此睡美百  
憂忘

新子温款春亭

曾數花鬚倚藥闌春風不到酒杯寬自怜白首荒  
三徑桃李年年檐上看

底柱圖

鬼門幽險深百篙人門逼窄逾兩牢舟人叫渡口  
流五性命咫尺輕鴻毛開圖頓覺風雷怒素髮飄  
蕭激衰腐河來天上石不移安得此心如底柱

寒林七賢

苦寒如此欲何之雪帽風裘意自奇縱有清詩三  
百首未應肯得黨家兒

過省寬谷

嬰兒偃蹇正堪孩換得山西老将回往者不追來

不戒莫將家世論人材

魯直墨跡

詩律如提十萬兵東坡真欲避時名須知筆墨渾  
關事猶與先生抵死爭

讀柳詩

功名翕忽負初心行和騷人澤畔吟開卷未終還  
復掩世間無此最悲音

憶劉及之

千株何處封君橘二頃誰家負郭田長路風塵空  
費日故園書札動經年未能免俗真聊爾不為懷  
憂亦悄然襟抱何人與開釋論文除得老臞仙

家園

五畝園連竹三間屋向陽氣和春浩蕩心靜日舒  
長花鳥成相識琴書付兩忘陶然一尊酒誰復記

義皇

晚望

獨立孤城上關山望不休  
異鄉驚絕域遠目豁清  
秋未擬登樓作空歌出塞愁  
故園飛鳥外溪水正  
南流

水南晚眺

小徑通沙穩清溪帶樹深  
岸危低白屋雲近沒青  
岑洒落高秋氣飛騰志士  
心賦詩增感激流水是  
知音

正月大風雨

風如渤澥勢凌虛寒破貂裘力尚餘  
不是化工難倚賴也知青帝有驅除

吊張益之

當年讀書山堂中夜喜與君燈火同  
塵編壞簡如蠹攻弱質鄙鈍煩磨礪  
新詩如洗露芒鋒逸氣欲倒浮雲  
馳輕裘肥馬世上雄吾徒一飯嘗未  
充君如孔翠愁彫籠我亦哀鴻避鳴  
弓孤城一別天西東幾見黃葉飛霜  
風寄書無由魂夢通西望落日

衙千峰峯他時雲雨儻相逢猶思驚雷起池龍鬼神  
 無賴欺天公哀哉若人竟死窮自聞君亡阜生胸  
 上訴九關無路從百年過眼如轉蓬夢時憂樂覺  
 即空長夜漫漫何時終作詩寄哀投殯宮  
別本長夜漫漫  
何時終為落句

黃山趙先生颯 三十首

颯字文孺第進士明昌末終於禮部郎中  
 性冲澹學道有得黃山其自號也閒閒趙

公云黃山正書體兼顏蘇行草備諸家體  
 超放又似楊契式當處黃魯直蘇才翁伯  
 仲間党承旨篆陽冰以來一人而已而以  
 黃山配之至今人謂之黨趙有黃山集行  
 於世涼隱云峩峩景明宮五雲湧蓬萊山  
 空白晝永野曠清風來放遠亭云晴日未  
 消千嶂雪暖風先放一川花青天低處是  
 平野白鳥去邊明落霞秦村道中云桃花

都被風吹却楊柳似將烟染成其餘多稱  
此

晚宿山寺

松門明月佛前燈庵在孤雲最上層犬吠一山秋  
意靜敲門時有夜歸僧

僊和尚坐脫

識得從來覺性圓西歸隻履更翛然永嘉穩步曹  
溪路臨濟飽叅黃蘗禪桶底脫時無一物機輪轉

處有三玄火中留得一草莖草依舊光明爍大千

黃山道中

小穀城荒路屈蟠石根寒碧漲秋灣千章秀木黃  
公廟一點飛雲白塔山好景落誰詩句裏蹇驢駝  
我画图間膏肓泉石真吾事莫厭乘閒數往還

郊外

迥野饒秋色高臺半夕陽鷗眠沙渚靜鳥沒嶺雲  
長薄宦違幽興浮生更與鄉歲華成白首丘壑愈

難忘

貢院中懷山中故居

歲晚西溪路誰過  
舊草堂苔紋侵柱礎  
竹色度隣墻  
白首先陰疾  
青山意緒長  
相思老兄弟  
夜夜夢還鄉

貢院聞雨

燈暗風翻幔  
蜚吟葉擁墻  
人如秋已老  
愁與夜俱長  
滴盡堦前雨  
催成鏡裏霜  
黃花依舊好  
多病不

能觴

聚遠臺

獨上平臺上  
風雲萬里來  
青山一尊酒  
落日未能回

秋日感懷

歲月不相饒  
秋風颭已至  
蚊雷稍收聲  
團扇且復置  
夕雨不宜人  
新涼差快意  
數篇東臯詩  
引我北窗睡  
林泉久隔濶  
塵土作憔悴  
但有適人適  
何嘗

事吾事一貧既忘懷所好無不遂世無陶靖節何  
人知此味

用仲謙元夕詩韻

聞道藍田輞口莊歌湖前日具飛航李膺定已回  
仙棹王績無由入醉鄉薄宦繫人如坐井窮愁染  
鬢欲成霜早知上界多官府只向人間作酒狂

分韻賦雪得雨字

大雪初不知開門已無路驚喜視曆日此瑞固有

數池冰凍欲合林鴉噤仍聚已成玉壺瑩尚作寶  
花雨造物固多才中有無盡句大兒擬圭璧小兒  
比鹽絮後人例蹈襲彌復入窘步聚星號令嚴亦  
自警未悟誰有五色筆繪此天地素好語覓不來  
更待偶然遇

和茂才韻

十年爲客未還家贏得毵毵兩鬢華別後故人應  
念我不來踏雪看梅花



留題西溪三絕

誰開玉鑑瀉天光  
占斷人間六月涼  
日落沙禽猶未散  
也知受用藕花香

又

波光湛碧冷無痕  
眇眇輕風起縠紋  
認得朝來踈雨過  
却因水底見飛雲

又

搃道西溪画不如  
豈知造物用功夫  
蟾光忽作靈

犀透表裏通明兩  
玉壺

九日懷尹無忌

茅屋秋蕭索  
幽居畫日開  
碧雲看欲暮  
遠客幾時還  
書劍成何事  
風塵只強顏  
思君千里夢  
夜夜到

燕山

立秋

日月如川流去矣  
不復回  
萬物各有營  
榮悴更相催  
餘生苦多艱  
壯志久摧頽  
念欲學還丹  
鬱紆殊

未諧今朝立新秋庭樹西風來舉首望天宇飛雲  
獨舞何呼兒且沽酒浩歌豁秋懷醉中得妙理逸  
興何悠哉

和崔深道春寒

長風忽落青林端風聲洶若江聲寒太陰盤礴亂  
天序推書撲筆成長歎美人何許媚幽獨使我不  
見心無歡頗聞隱居誦莊屈篷窗坐擁塵編殘琴  
歌酒賦兩寂莫懸知此興殊未闌遲君一來吐款

要舉盃放目雲天寬

西城觀水

西山秋水來天地巨野橫流浩無際長風撼浪鱗  
甲生兩角斜分半山際繚堤北去接飛橋鼓鼙洶  
洶翻驚濤中流突兀玉山起直疑河伯驅靈鼇冷  
光搖蕩秋雲白渾似夢中遊震澤隔林我欲喚漁  
郎孤帆忽如過鳥翼安得酒船常拍浮四時甘味  
置兩頭何人與我同此樂潁陽試覓元丹丘

盆池荷花

一泓寒碧甃波光  
雨後妖紅獨自芳  
不許纖塵汗  
天質政須清  
吹發幽香洛神初試  
凌波襪妃子來  
從礮石湯休笑埋盆  
等兒戲要令引夢水雲鄉

扈從車駕至荆山

海上飛來碧玉峰  
瑤林琪樹更青葱  
參差樓觀浮雲表  
真倒山光落鏡中  
侍從有臣司碧落  
笑談無處不清風  
好分靈沼為膏澤  
乞與人間作歲豐

中秋

秋氣平分月正明  
藥珠宮闕對蓬瀛  
已驅急雨消殘暑  
不遣微雲點太清  
簾外清風飄桂子  
夜深涼露滴金莖  
聖朝不奏霓裳曲  
四海歌謳即樂聲

元嘗從文孺學詩說道陵中秋賞月瑞光樓召文孺對御賦詩以清字為韻道陵讀至落句大加賞與手酌金鍾以賜且字之曰文孺以此鍾賜汝作酒直士林榮之高祖言吾不如子房君父字呼臣下不為無故事也

題齊物堂

至人識破浮生理萬變何嘗有不同果蝶夢周周  
夢蝶爲風乘我我乘風得時未必全無識窮處方  
知却有通畢竟欲齊齊底物世間元是一虛空

秋郊晚望

桃竹猶堪杖幽尋興頗嘉池荷能幾葉籬菊不多  
花地坼成龜兆林枯出犬牙村農慶豐歲社鼓已  
三槩

元日

馬上逢元日東風送客愁滹池春水度瀛海夕陽  
樓雪照潘郎鬢塵侵季子裘勞生已強半更欲玷  
清流

過良鄉縣學

儒宮宜地僻竟日有餘清殿古碑仍在庭空草自  
生風高時脫木雲重欲摧城客興已消洒秋堂更  
雨聲

和詵上人雪詩

貧巷仍飛雪空庭迥絕塵照窓疑不夜着樹忽驚  
春枕冷夢魂短山明天宇新賦詩分氣象定有灞  
陵人

澗上

遠徑留殘照疎林出小園山川半豺虎歲月且琴  
尊杜老新雞柵龐公舊鹿門不才真忝竊人道典  
刑存

新涼

頗覺小眠快便知秋意真清風論世舊老圃得時  
新移竹觀君子翻書訪古人可人陶靖節隨意葛  
天民

過衛縣董大夫廟

漢朝元不用真儒豈信忠嘉益帝圖賈誼長沙晁  
錯死不須獨恨老江都

寓居寫懷

平陸溫風雪半消孤煙籬落隔溪橋迹虛人去林

臯靜時有晚鴉銜隋樵

劉左司昂

十一首

昂字之昂興州人大定十九年進士曾高  
而下以科名相踵者七世矣昂天資警悟  
律賦自成一家輕便巧麗爲場屋捷法作  
詩得晚唐體尤工絕句往往膾炙人口張  
秦娥者頗能小詩其賦遠山云秋水一抹  
碧殘霞幾縷紅水窮霞盡處隱隱兩三峰

其後流落之昂贈詩云遠山句好画難成  
柳眼才多摠是情今日衰顏人不識倚爐  
空聽煮茶聲又云二頃山田半欲蕪子孫  
零落一身孤寒窗昨夜蕭蕭雨紅日花梢  
入夢無娥爲之泣下屏山故人外傳記之  
昂早得仕年三十三省掾考滿授平涼路  
轉運副使人謂卿相可坐致矣術士有言  
之昂官止五品者之昂自望者甚厚不信

也俄丁母憂為當塗者所忌連蹇十年卜  
 居洛陽有終焉之志有薦其才於道陵者  
 泰和初自國子司業擢左司郎中將大用  
 矣會遼陽人大中欲搖執政賈鉉為言者  
 所劾辭連之昂道陵震怒一時聞人如史  
 肅李著王宇宗室從郁皆譴逐之鉉尋亦  
 罷政之昂降上京番守判官道卒竟如術  
 者之言

醉後

禪僧勸讀傳燈錄道士教行進火功今日興來俱  
 破戒黃花籬落醉西風

山中雨

嵩高山下逢秋雨破繖遮頭過野橋此景此時誰  
 會得清如窗下聽芭蕉

都門觀別

買酒消閒愁剪刀剪流水閒愁不可消流水無窮

已悠悠窗下斷腸波總是行人隋淚多門外馬嘶  
 思遠道小頻猶唱渭城歌歌聲未斷征鞍幾望斷  
 垂楊人影滅斜陽照影却歸來兩地相望今夜月  
 閱人多矣主人翁離別都歸一笑中陌上行人終  
 不悟年年楊柳怨春風

客亭

折盡官橋楊柳枝春風依舊綠絲絲啼鶯為向行  
 人道離別何時是盡時

山堂

山雨溪邊過山堂夜獨吟悠悠松上月照見壁間  
 琴

平張維翰維中兄弟

蓮幕清曹粉署仙福孖禍倚豈其天座隅異物鵬  
 來止地底佳城馬不前萬里青雲今已矣兩枝丹

桂竟徒然阿奴莫愛聲名好碌碌持家亦自賢

維翰

名甫第一人擢弟維中名庸此榜乙科阿奴謂非  
 舟字維賢後以省元登科兄弟科名如此近世所



也未有

即事二首

雨洗明河画扇收  
胡秣露冷藥闌秋  
墻陰未得中庭月  
一點螢光草際流

又

山花山雨相兼落  
溪水溪雲一樣閒  
野店無人問春事  
酒旗風外鳥關關

歌風臺

劉項興亡轉燭過  
亂蟬吟破漢山河  
長陵卧老咸陽月  
沛上猶傳擊筑歌

吊李仲坦

仲坦物故後省試魁始有特恩之命

文章巧與世相違  
身後新恩事已非  
不及萋萋原上草  
一番春雨綠如衣

王官谷

潛溪時照塵埃客  
微雨不遮天柱峯  
斜日落花人去盡  
淡烟樓閣數聲鍾

魏內翰搏霄 三首

搏霄字飛卿初用蔭補以薦書從事史館

明昌中宏詞中選授應奉翰林文字未幾

卒飛卿詩以富艷稱如張公子席間賦嵩

山筆力豪逸党承旨許其在劉無黨之上

云

送河南府尹張壽甫赴關

夜半思綸出漢宮朝家虛席待燕公春風已徧湖

山外元氣還埽鼎鼎中侍從定誰陪白鳳低回空

自惜冥鴻洛川萬頃蒲萄碧長與清愁日夜東

次韻田若虛遊龍門寶應用天隨子體賦詩因次

其韻二首

少室右臂禹所斲開排清伊來高寒土肉養石自

古秀山腰流泉無時乾佛髻滴滴染溼翠松風颭

颭鳴驚湍白傳已矣不可見予誰從之投歸鞍

又

關塞若鹿馬奔騰多奇厖怒爾不可沮西來何控  
 控駿足忽勒破英才如拘龐有客善體物新詩魯  
 僧窗晏輩豈足道微瀾生盆缸徑續杞菊意來浮  
 玻璃江吏部昔竄謫猶能題臨瀧况此六大寺礎  
 堂時鳴樁紫翠出萬瓦天風旋珠幢興寄百斛鼎  
 無才誰其扛會聽項籍約吾將從之降

王隱君礪 一十三首

礪字逸賓先世家臨洛至逸賓遂為汴梁

人博學能文不就科舉孝友天至非其食

不食家無甌石之儲晏如也明昌中故相

馬吉甫惠迪判開封舉逸賓王彥功游宗之

德行才能逸賓得鹿邑主簿就乞致仕彥

功以親老調鞏州教官宗之讓不受三人

者雖出處不齊而時人皆以高士目之閒

閒公嘗集党承旨趙黃山路司諫劉之昂

尹無忌周德卿與逸賓七人詩刻木以傳

目為明昌辭人雅製云

暮春郭南

大梁城外孤臺倚煙昏水碧春林芳憑高極目見  
歸鴈風物令人思故鄉紫金山下斜陽暮萬里川  
光照雲樹山間細雨花落時何人來往東風路

記南塘所見簡孟友之

大橋南郭野橋東十里垂楊十里風渺渺烟波連  
御道離離雲稼入郊宮雨滋蔓草曉逾綠日暎荷

花晚更紅登覽只宜開笑口尊前六客回衰翁

次文遠韻

野性唯便闕寂居蒼苔鳥跡滿庭書林花過雨紅  
猶重籬竹和烟翠亦疎已與農人成保社更令兒  
輩學耕鋤賞音只有東郊客日袖新詩到敝廬

謝竹堂先生見過

學稼古寺側結廬高柳陰音書故交絕歲月杜門  
深新雪添衰鬢寒灰死壯心西州賢別駕連日肯

相尋

次友之秋日雨後韻

洛州秋雨後幽勝可供閒  
白首番他縣歸心遠故  
山野泉來竹底危磴入  
雲間尚記登高會重崑  
細菊斑

寓居南村

朝來出門無所適野徑  
雨晴沙不泥鼓笛誰家  
賽春社杖藜隨過柘岡  
西

雜詩七首

陰陰綠樹閣庭除散盡  
鳴禽靜有餘獨對爐薰  
坐終日會心惟有漆園  
書

又

瓦爐柏子細烟消閑讀  
禪經破寂寥風細月高  
人已靜隔窗疎竹夜蕭  
蕭

又

晴日南溪物色饒草芽  
新綠凍全消金絲柳底  
洲

沙沒數尺流波拍野橋

又

南畝東臯春務時田家候雨罷  
畊犁却汲井泉澆藥圃更疏陂  
水灌麻畦

又

竹繞沙村水漫流鳩鵲鷓鴣對沈浮  
一竿便擬從漁父卷置琴書買釣舟

又

屋頭蔽木撼蒼烟風卷飛花到枕邊  
南寺有僧來問字打門驚覺午窗眠

又

漢梁王苑古臺西秋思紛紛獨杖藜  
雲壓高城鴈飛盡一聲寒角夕陽低

劉治中濤

六首

濤字及之夏津人明昌二年同進士  
用戶部尚書孫鐸薦入翰苑歷太原運副汾州

倅入為太子贊善以彰德治中致仕尋卒  
沁南節度康瑋良輔葬之林慮之寶巖

小雪

黃紬被暖起還慵小雪經簷落旋空舊館簿書寬  
半餉冷官庭戶滿西風馬道其窘三山瘦人坐詩  
工五鬼窮安得東風囑桃李也教春色到衰翁

和德卿雪

南華香火是真依不學呼鷹雪打圍梁苑舊遊荒

徑改潁濱新唱綵箋飛春生東閣酣朝飲寒入西  
鄰泣夜機夢寐扁舟釣江水重嗟白髮此心違

井陘

寒陸歲崢嶸山陰日少晴敗眠雞小梗勸坐火多  
情便面堪長路牽頭破老兵誰教戀升斗盡室此  
途行

宿平遙集福寺

院僻和僧靜門閒與晝長燕泥朝雨淖蝶蘂晚風

香野興煎詩思乾愁繞客腸青奴如解事供我暮  
窗涼

送王純叔守曹州

柏路人看御史驄年來眼落簿書叢單車乍別金  
鑾月五馬頻嘶玉勒風故國山河連小鄆舊家雞  
犬識新豐遙知別夜詩成處醉袖淋漓蜜炬紅

戲用前人語題天平別墅

表聖當年絹五千休休亭下買林泉黃華面目君

還見天柱峯高不直錢

劉左司中 二首

中字正夫漁陽人屏山故人外傳云正夫  
爲人短小精悍滑稽玩世中明昌五年詞  
賦經義第詩清便可喜賦甚得楚辭句法  
尤長于古文典雅雄放有韓柳氣象教授  
弟子王若虛高法勳張履張雲卿皆擢高  
第學古文者翕然宗之曰劉先生以省掾



從軍南下改授應奉翰林文字為主帥所  
 重常預祕謀書檄露布皆出其手軍還授  
 左司都事將大用矣會卒有文集藏於家  
 周德卿嘗謂正夫可敬從之可愛之純可  
 畏皆人豪也

冷巖公柳溪

斗印輕拋繫肘金故園風物動歸心柳含煙翠絲  
 千尺水寫天容玉一尋山色只於關裏好風波不

似向來深人間桃李栽培滿換得溪南十畝陰

龍門石佛

鑿破蒼崖已失真又添行客眼中塵請君看取他  
 山石不費工夫搃法身

路司諫鐸

二十六首

鐸字宣叔伯達之子與弟鈞和叔父子俱  
 有重名而宣叔文最奇尤長於詩精緻温  
 潤自成一家任臺諫有古直臣之風貞祐

初出爲孟州防禦使城陷投沁水死有虛  
舟居士集得之鄉人劉庭幹家

書州驛壁

雉堞俯已見羊腸行尚難炊煙界沮水老木識橋  
山時廢無人弔臺高有鳥還客懷秋館雨未老鬢  
先斑

王子端挽辭

才名如此不償窮再入承明一病翁白髮光陰文

字裏黃華林麓畫圖中謫仙猶想屋梁月荆產空  
懷松下風聊應世緣緣故在會看歸鶴語遼東

慶壽寺晚歸

九陌黃塵沒馬頭眼明佛界接仙洲清溪照影紅  
蕖晚禪榻生涼碧樹秋少室宗風開木義裕陵遺  
墨爛銀鈎對談不覺山銜月只爲松風更少留

賦丈室碧玉壺善甫賦詩鐸亦奉和二首

心知雲路等榆枋戲作方壺當玉堂虛靜自應詳

止止道遙均是一蒼蒼  
心含寶月無中外  
身著青霞可頡頏  
政爾天遊到疑始  
覺知誰送竹風香

又

隨人作計魚千里  
知命無憂鳥一天  
碧落雲深堪

避世

碧落洞名

九華煙暖可忘年  
平章萬有歸玄覽  
收

拾方心入大圓上  
界真人自官府  
不妨聊作橘中

仙

次韻答季通

華顛何意軟紅塵  
霄漢聊收退鷁身  
方喜長松倚東野  
又從淨社得遺民  
高山流水知音少  
霽月光風發興新  
賴有好詩相慰籍  
不然開口欲誰親

雨中

月翳有時吐風薰  
俄自清雲理暑天  
影雨進夜窗聲  
眠聽叅天籟  
神游得化城  
覺來還故處  
飢鼠撼燈檠

輞川

畫圖風景是亭榭  
歲年非秋色半黃  
落人煙深翠微  
暗溪魚得計  
杳靄鳥忘機  
觸物增惆悵  
吾廬早晚歸

高唐劉氏駐春園

風光去人無咫尺  
人自塵勞不相及  
此心既定境從之  
雪樹霜林亦春色  
劉翁有道久陸沈  
十年種樹今成陰  
醉鄉天地白日永  
鷓鴣栗畱皆好音  
良辰行樂今已矣  
依舊東流泛蘭芷  
誰道青春挽不

畱鯉庭看取新桃李  
膏車秣馬吾將歸  
擔與清景相追隨  
安用苦求三徑資  
明月常滿千家墀

赫仲華求賦鄴臺張氏野堂

白沙翠竹小江村  
路轉西郊隔市塵  
入坐好山如有素  
忘情鷗鳥澹相親  
芋魁飯豆平生足  
澗草崑花各自春  
得酒誰能更羈束  
不妨倒著白綸巾

題鄒公所葺淵明歸去來圖

牛刀小試義熙前  
一日懷歸豈偶然  
有意候君門

外柳無機還我酒中天貞姿佳菊秋霜裏真意南山夕鳥邊善學展禽唯此老萬人海裏小斜川

衛州贈子深節度

淇上風光萃一樓尊前吐海百無憂平分玉鑑漁村晚四望黃雲寡婦秋望一作斜照鈎簾納煙翠微颺高枕看安流梅天消息和羹近老穉寧容挽鄧侯

潼關

樓迴臨飛鳥車升汗十牛地靈開翠壁天遠送黃流趣戰如新計當關豈壯猷天梯且失守况說土山頭

七夕與信叔仲荀會飲晚歸有作

秋香瀉月笑談香飲散歸來夜未央關角星河搖淡影柳行燈火試新涼雄飛勳業歸時輩信美江山著漫卽萬事浮雲心鐵石休將梁國嚇蒙莊

襄城道中

有言長官暴橫者

禾黍低風汝水長  
遲遲驛騎困秋陽  
病軀官事交相礙  
夢雨行雲肯借涼  
盡說秋蟲不傷稼  
却愁苛政苦于蝗  
詩成應被西山笑  
已炙眉頭尚否臧

感寓

汙汙一水抱山流  
路轉岡陵到渡頭  
張翰秋風動  
歸興惠崇烟雨著  
孤舟祿輕道重從  
三黜日暮人遙幾  
四愁世事悠悠莫  
回首聊憑酒聖作  
天游

冠氏雨中

氣蕭關河萬綠摧  
遠遊節物動悲哀  
人牛不見曉烟重  
草樹有聲山雨來  
老矣何堪米鹽事  
中之安得聖賢盃  
遙憐鶴髮孤雲底  
日望林梢一葉迴

細香軒三首

花氣爐烟搃不同  
喫青噴翠小窗風  
中邊故嗅渾無有心跡  
相忘忽暗通

又

閣雨含風戶牖涼  
聞機才發興何長  
無心孤竹邨

能爾自是詩人知見香

又

霜雪青青玉一叢肯從桃李借薰醲不知香界何  
從立憑仗清風問籀龍

芳梅如佳人贈襄城衛昌叔

芳梅如佳人不見令人思豈無桃李顏夏蟲篤於  
時霜風靜天宇蘭悴菊亦衰凌寒一笑榮功烈如  
彼卑幾年幽西路赭岡望逶迤思之不得見空吟

水曹詩夜月將夢去雲深水之湄邂逅疎竹邊  
峩峩認風儀今日真見止昨夢猶著龜塵中儻  
儻子謂我酷好奇逃空聞足音此心胡不夷

遂初園詩 閑閑堂

行邁已自勞坐忘猶有為動靜二塵耳一真非即  
離舉頭見青山曲肱轉黃鸝心安萬境寂境轉何  
妨隨

思玄堂

塵世一何隘永懷耿中情端著得吉卜有鶴戾天  
 鳴慨然趣予衰雲旗渺遐征鴻濛偶相值笑我勞  
 經營駕言還故鄉方寸以道寧先疇理耘耔初服  
 紉芳馨諦觀九州事曾不出戶庭漁父有默識鋪  
 糟愈於醒

附錄 汴梁公廨西樓二首

官舍誰言隘西樓興不窮開雲欹枕裏飛鳥捲簾  
 中風定天還水烟虛月度松回觀猶有愧破屋著

盧仝 盧仝以方處士王逸賓

又

雲態看來變簷陰坐次移一蟬吟未了雙鳥去何  
 之薄宦槐安夢浮名劍首炊安心元有法遣興可  
 無詩

次韻鄺著作病起

玄晏耽書昔坐癡如今手板對山持病知居士安  
 心處貧是詩人換骨時單見敢叅東觀論徐行休



歎後山遲山林朝市元無異怨鶴驚猿自不知

師拓 一十三首

拓字無忌平涼人舉進士不中明昌中有  
 司薦其才以嗜酒不果作詩有氣象而工  
 於鍊句如賦鴈云天低仍在眼山沒更傷  
 心溪上云夕陽明菡萏秋色靜蕪葭白曳  
 衝烟鷺紅翻漾水霞春日池上云水風涼  
 綺席沙日麗金壺燕市酒樓云氣清天曠

蕩露白野蒼涼又荷蒼秋近葉蓮膩雨餘  
 花大為時人所稱

秋夜吟

阪路太行險波濤滄海深素縕未偶時白髮將盈  
 簪壯士暮年意游子中夜心拊劍一太息月暗天  
 橫參

浩歌行送濟夫之秦行視田園

霜斂野草白氣肅天宇清開尊酌遠客餞此秦關

行秦關杳杳愁西顧千里蒼茫但烟樹子今行轡  
按秋風想見秦關雄勝處河流洶洶崑崙來蓮峯  
秀拔青雲開終南南走絡巴蜀五陵北望令人哀  
我本渭城客浪迹來東征窮齊歷宋嗟何營尚氣  
慕俠游梁城信陵白骨委黃土夷門誰復知侯生  
拊劍一長嘯作歌誰爲聽青天白日空冥冥不能  
乘桴入滄海拂衣且欲歸汧涇落魄高陽歸未得  
送子西歸空愴情

冬夜二首

雲破月穿牖夜嚴風號隙客子寢不安寒燈照空  
壁默然不平事起坐長太息書但記姓名劍本匹  
夫敵追奔慕前哲恢張濟時策何意造物兒重此  
稻梁役興酣氣益振孤憤遠飄激非無南山雲高  
卧養虛寂茹芝酌懸流嘯吟展胸臆聖達豈不念  
且有不暖席此抱誰與知乾坤夜寥閭

又

破屋星斗入疎牖霜風生沈沈夜何久杳杳天不  
明燈暗飢鼠出月朗棲鳥驚幽意苦盤礴歷落窮  
小絃貧賤豈足戚所思吞下英盤木無先容竟與  
枯朽并旃毳脛纜掩藜藿腹不盈鬱鬱命世才何  
階伸一鳴僵卧蓬蒿底要路誰爲名恥作埽門謁  
寧爲醴酒行直將叫閭闔皎皎開寸誠白日下  
照廓廓賢路亨此志恐未必搖蕩熱中情

游同樂園

晴日明華構繁陰蕩綠波蓬丘滄海遠春色上林  
多流水時雖逝遷鶯暖自歌可憐歡樂極鈺鼓散  
雲和

陪人遊北苑

甲子歲

繫馬溪邊酌啼鶯柳外聞望長魂欲斷愁豁酒微  
醺草色明殘照江聲入暮雲故園春已到歸思日  
續紛

曲江秋望

山遠嶂重出野平天四圍涼風芡實坼久雨藕花  
肥水濶漁舟小天長去鳥微紫蒲行處有采采莫  
盈衣

和王逸賓繁臺詩

憑望矜臺迥長吟苦思荒行雲春郭暗高鳥暮天  
蒼草色傷心極松風洒面涼故園兵革外殊覺路  
途長

贈雲中劉巨濟

雲廓乾坤迥霜摧草樹殘風聲秋晚急月色夜深  
寒綠綺音誰會青霄氣自干那知燕市裏把酒得  
交驩

郡城南郭早望

曉立回塘上何人逸興同柳濃天霽雨萍坼岸含  
風鳥影明蒼靄湖光倒碧空秦川何日到解髮濯  
清澧

中元後二日

暑謝涼生際庭虛雨過時  
天長雲斷續風急樹離披  
世態貧逾薄秋光老易悲  
燕城寒事早還與舊

貂期

和張叔獻題首善閣

岩堯飛閣與雲齊  
來凭脩欄日轉西  
秦客此時愁欲醉  
隴山何處望渾迷  
九天花鳥催春事  
千里風烟入暮題  
久怕殊方看節物  
不知今日在丹梯

鄴著作作權

一十六首

權字元輿安陽人作詩有筆力圃田道中

云斲橋經壞屋古道入崩山石礪云蒼崖

秀苔花壞道補石棧徐行下井底斗上出

天半綺岫宮云離宮巋相望百年幾遊歷

獨知窮已樂衆對不汝恆繁華忽灰燼歲

月空瓦礫赤水道中云水近噓寒氣星殘

曳白芒燒痕云炎威隨變滅餘燼委丘壤

田疇更斲續原隰依下上班班澗溪毛往

往漏尋丈晴空隋雪影夕照墜秋嶂昆明  
翻刮灰黑水走濁浪烟中一線來細路入  
空曠游石甕云雲間兩石角相鬪如關門  
上連石甕口豁訝愁猱猿枵如空洞腹瑩  
滑無纖痕何年補天手月斧雲爲斤琢成  
蒼王羸覆此玻璃盆龍潭云臺高野望遠  
地僻春意閒郊行云強引村膠終少味漫  
留詩句嬾題名村行云瘦藤籬角蔓雜草

樹根花夾道懸新棗荒畦卧晚瓜又云歲  
豐人樂社秋近客思家書事云佳樹漲新  
綠危蕪棲老紅與顯叔云茶竈翻春白糟  
戶滴曉紅雜詩云樹影僧攜錫鈴聲客到  
東門片月冷千嶂敗橋通兩村此類甚多元  
與父瓊國初有功仕至武寧軍節度使元  
與以門資叙宦不達朝廷高其才明昌初  
以著作郎召之未幾卒有坡軒集行於世

玉關消息到長安  
處處砧聲搗夜闌  
想得月殘哀響斷  
一燈清淚剪刀寒

夷門遣懷

梁園花木艷精神  
盡屬東風點綴人  
雪壓老梅香不起  
問君消得幾多春

西游雜詩

茅店雞聲外柴車  
犬吠聞疎星涵積  
水殘月隨昏

山好夢人何在  
秋風我獨還梨園  
有名酒聊此慰  
閒關

慈恩寺塔

慈恩石刻半公卿  
時遇聞人爲指名  
龍扁榜中休著眼  
一篇俚賦誤平生

木犀

菊小未堪摘  
荒池悴芙蓉窮  
秋不慰眼幽獨將  
焉如殷勤葢宮子  
種桂庭之除  
乘閒弄餘花  
散落荒

山隅從茲雲月裔漂泊生江湖娟娟耐凍枝便與  
群芳殊琉璃剪芳葆蛾黃拂仙裾唾袖花點碧漱  
金粟生膚好風一披拂九里香縈紆蘭蕙不敢友  
荃蓀正僮奴妄意此尤物化工異吹噓不然九天  
香安得獨付渠託物寄深縕古今一三閭收攬名  
草木自比君子徒惟茲不挂口無乃聖不居抑夫  
古簡編斷缺秦火餘君看齊魯臣史筆逸其書惜  
哉不可曉臨風為嗟吁尤怜元祐前不及附歐蘇

末路益可惜例進宣和初仙根豈易致百死不一  
甦昔遊汴離宮識此傾城姝摩挲三品石尚想狎  
客娛却後十五年微霜半粘鬚一枝再經眼相對  
怜羈孤不知苦何事玉骨乃爾癯故人怜我老尺  
書遠招呼要趁秋香濃共此碧玉壺遙知嬋娟客  
與我笑一俱

竹林寺矮松

蒼烟靄山曲回溪抱脩筠中藏古佛宮荒僻無四



鄰靈松插殿脚偃蹇今幾春何年霹靂雨抉石搜  
潛鱗謫重飛舉難隴此蜿蜒身聯拳縮爪股氣屈  
不得伸卧枝老無力支撐藉樵薪無風自悲吟失  
水固不神安知才不才禍福了已分南山得千嶂  
直幹排風雲正以中繩墨中道遭斧斤豈知無用  
資千歲保其真何必求先容養此老困輪我亦愛  
奇節歲晏守賤貧他時來汝伴露頂挂葛巾

自鶴壁游善應洹山

清晨發鶴山瘦馬陵峻嶺春風吹雪谷朝霧溼雲  
影羊腸抱傾崖絕壑如下井硤關山却立老眼入  
絕境人家跨清溪桑柘鬱數頃西行復幾里崑崙  
栖短景窮溪水源清澹澹如細綆下流泉滿山勢  
合久方騁灘光落鏡明嵐氣霏雨冷何年鑿青壁  
兩佛入禪定殘僧以零落遺塔寄烟暝荒涼布金  
地雜還樵牧徑同遊成六逸轟飲助高興晉連更  
坐卧談笑發嘲咏感物復歎嗟醉語忽逗廷青山

不愛寶歲歲出礬礦公場沸千夫利井供百鼎誰  
 開爭奪源敗此丘壑勝頗思呼有力擲入萬里迥  
 天神定笑我癡絕謾生癭長懷古畸人飛夢遠箕  
 頰

八渡崖

奔湍百折似蟠虬響入山根匯復流咫尺蒼崖溪  
 八渡等閒黎杖我頻遊層崖障日樵聲晚寒谷呼  
 風樹影秋安得剝栽溪上竹一庵領盡兩山幽

留仲澤

朝衫酒溼紫宸霞暫輟於旗擁使華馳馬彎弓直  
 將種載書囊筆自名家江湖萬里春回鴈燕趙千  
 林月滿花明日升沈便霄壤更留玉樹倚蒹葭

寄唐州幕官劉無黨

白髮青衫宦苦卑邊荒誰識鳳麟姿河西落魄高  
 書記劍外清貧杜拾遺紫玉山高傳楚夢蟻珠淵  
 靜照黃陂禁中頗牧他年事先遣江淮草木知

除夜二首

殊方節物老堪驚  
病怯諸隣爆竹聲  
梨栗異時鄉國夢  
琴書此夕故人情  
眼看曆日悲存歿  
淚濺屠蘇憶弟兄  
白髮明朝四十七  
又隨春草一番生

七夕

縹緲針樓外  
天教彩羽過  
步雲榆送影  
拂月桂交柯  
繡縷索芳袂  
瓜蓮得巧梭  
常娥如解妒  
還與試斜河

濟源廟海子內有二黿人以將軍目之投餅

餌則至

我欲燃犀起  
蟄雷謾誇海  
離紙錢灰  
將軍不是池  
中物也爲  
區區餅餌來

裴公亭

十里蓮塘際碧山  
入潭無數竹根泉  
詩狂欲洒亭間  
醉却媿文公與樂天

郊行二韻

十里脩篁翠拂天青田漠漠水濺濺高林忽斷驚  
回首不覺竒峰墮眼前

又

溪橋納納馬蹄輕竹裏人家犬吠聲行盡灘光溪  
路黑隔林燈火夜深明

禮部楊公雲翼

三十一首

雲翼字之美樂平人明昌五年經義進士  
第一人詞賦亦中乙科天資穎悟博通經

傳至於天文律曆醫卜之學無不臻極事  
母孝與人文款曲周密處事詳雅而能以  
大節自任南渡後二十年與禮部閒閒公  
代掌文柄時人號楊趙而公以後輩自處  
不敢當也宣宗頻歲南伐事勢有決不可  
者論議之際時相多以避嫌不敢言公獨  
直言極諫以爲兩淮生靈皆陛下赤子不  
能外禦北兵而取償於宋以天下爲度者

不如是也是後再出兵時全一軍幾爲宋人所覆宣宗悔悟責主兵者曰我當何面目見楊雲翼耶興定末拜吏部尚書中外望其旦暮入相竟以足疾不果正大五年八月終于翰林學士年五十九謚曰文獻天下識與不識皆哀惜之至今評者以爲百餘年以來大夫士身備四科者惟公一人而已子恕字誠之第進士今在燕中

陽春門堤上

薄薄晴雲漏日高  
雪消土脉潤如膏  
東風可是多才思  
先送輕黃到柳梢

元林寺

煙浮霜壻閉禪關  
今落先生杖屨間  
碧水同來弄明月  
黃塵不解汗青山  
同緣多自成三宿  
物我終同付八還  
欲識光林全體露  
松花落盡嶺雲開

上白塔寺

睡飽枝筇徹上方門前山好更斜陽苔連碧色龜  
趺古松落輕花鶴夢香身世窮通皆幻影山林朝  
市自閑忙簾幡不動天風靜莫聽鈴中替戾岡  
聞韶圖

張廣文消搖堂

方寸閒田了萬緣大空物物自翛然鶴鳧長短無

餘性鵬鷃高低各一天身內江湖從獲落眼前瓦  
礫盡虛圓叩門欲問姑山事靜替由來愧叔連

侯右丞雲溪

功成何許覓菟裘天地雲溪一釣舟夢破煩襟濯  
明月詩成醉耳枕寒流西風歸興隨黃鵠皎日盟  
言信白鷗政恐蒼生未忘在草堂才得画中游

大秦寺

寺廢基空在人歸地自闌綠苔昏碧瓦白墻映青

山暗谷行雲度蒼煙獨鳥還喚回塵土夢聊此弄  
澄灣

蔡村道中

水連深竹竹連沙村落蕭蕭已暮鴉行盡画图三  
十里青山影裏見人家

戴松画牛

春草原頭雨濕烟夕陽渡口水吞天披圖坐我風  
蓑底一夢長林二十年

迴文

梧井落花秋寂寂竹窗搖月夜沈沈孤鸞舞處回  
腸斷遠鴈來時別恨深

烟雨

涼氣先秋至重陰接望迷有無山遠近濃澹樹高  
低鳥雀枝間露牛羊舍址泥支頤政愁絕風雨過  
前溪

和吕介甫

山下三秋雨山中六月涼樹林溪谷暗花藥小闌  
香夢破風開卷詩成鳥送觴紅塵多內熱政爾救  
頭忙

謾興

乍寒簾幙一燈青從史羈情爾許清葉擁西風秋  
有思天垂北斗夜無聲吟菴遠夢家千里過鴈連  
愁月四更寄語黃華耐岑寂好看霜藥到歸程

雙成寺中登樓

雲意生陰晚不收西風疎雨一江秋  
畫圖忽上闌干角隱隱平灣轉釣舟

父老

寄樂平令  
胡德正

老去宦情薄秋來鄉思多遙怜桑壠在無奈棘林  
何白水青沙谷黃雲赤土坡幾時隨父老社酒太  
平歌

應制雪詩

陰雲破牖不曾晴瑞雪隨風落五更積玉未平塢



鵲瓦飛花先滿鳳皇城潤深農畝千疇綠塵壓龍  
沙萬里清最好壽杯浮喜色明年洗眼看昇平

元日

香炷猶餘去歲烟五更斗柄已回天來從天外春  
何早俵向人間老不偏莫問流光似流水且從今  
日數今年東風五十七年夢夢覺還驚雪滿蓀

太一湫

四崖環抱鏡光平數畝澄泓石底清寒入井頭千

丈雪淨涵巖際一天星傍人爭出魚依勢銜葉飛  
來鳥護靈日日東風送潮出只應絕頂透滄溟

應制白兔

聖德如天物効祥褐夫新賜雪衣裳光搖玉斗三  
千丈氣傲金風五百霜禁籞合棲瑤草影御爐猶  
認桂枝香中興慶事光圖謀黼坐齊稱萬壽觴

李平甫爲裕之画繫舟山圖閒閒公有詩某  
亦繼作

名利走朝市山居良獨難  
況復山中人讀書不求  
官東巖有佳致書室方丈寬  
彼美元夫子學道如  
觀瀾孔孟澤有餘曾顏膏未殘  
向來種德深直與  
山根蟠之子起其門孤鳳騫羽翰  
計偕聃爾耳平步青雲端  
竭來遊京師士子拭目觀  
禮部天下士文盟今歐韓  
一見折行輩殆如平生歡  
舞雩詠春風期著曾點冠  
五言造平淡許上蘇州壇  
我嘗讀子詩一倡而三歎  
世人非無才多爲才所謾  
高者

足談訶下者或辛酸  
吾子忠厚安不受薄俗漫晴  
雲意自高淵水聲無湍  
他日傳吾道政要才行完  
會使茲山名與子俱不刊

關關公爲上清宮道士寫經  
并以所養鷺群付之諸公有詩  
某亦同作

會稽筆法老無塵  
今代關關是後身  
只有愛鷺緣已盡  
舉群還付向來人

屏山李先生純甫二十九首

純甫字之純，汝州人。承安四年進士。仕至尚書右司都事。爲舉子日，亦自不碌碌於書，無所不闕。而於莊周、列禦寇、左氏、戰國策，爲尤長。文亦畧能似之。三十歲後，徧觀佛書，能悉其精微。既而取道學書讀之，著一書，合三家爲一就。伊川、橫渠、晦庵諸人所得者，而商略之毫髮，不相貸。且恨不同時，與相詰難也。性嗜酒，未嘗一日不飲，亦

未嘗一飲不醉。眼花耳熱，後人有發其談端者，隨問隨答，初不置慮。漫者知所以統窒者，知所以通。傾河瀉江，無有窮竭。好賢樂善，雖新進少年，游其門，亦與之爲爾汝。交其不自貴重，又如此。迄今論天下士至之純，與雷御史希顏，則以中州豪傑數之。子全，字稚川，今居鎮陽。

雪後

玉環暈月蟠長虹飛沙卷土號陰風黃雲冪冪翳  
晴空屋頭唧唧鳴寒蟲天符夜下扶桑宮玄冥震  
怒鞭魚龍魚龍飛出滄海底咄嗟如律愁神工急  
斨北斗捲雲漢凌澌捲入天瓢中椎璋碎璧紛破  
碎六花剪出寒瓏璵翩翹作穗大如手千竒萬巧  
難形容恍如隨我銀沙界清光縞夜寒臃臃肝腸  
作祟耿無寐試把往事閒追窮男兒生須銜枚卷  
甲臂琯弓徑投虎穴榮竒功不然羊羔酒漲玻璃

鍾侍兒醉臉潮春紅誰能寒驢馳著灞陵東骨相  
酸寒愁煞儂屏山正吐黃蘂氣笑倒坐間云是公

赤壁風月笛圖

鉦鼓掀天旗脚紅老狐騰落武昌東書生那得麾  
白羽誰識潭潭盖世雄裕陵果用軾爲將黃河倒  
捲前西戎却教載酒月明中船尾嗚嗚一笛風九  
原喚起周公瑾笑煞儋州秃鬚翁

送李經

髯張元是人中雄喜如俊鶻盤秋空怒如恠獸拔  
 古松老我不敢嬰其鋒更著短周時緩頰智囊無  
 底眼如月斫頭不屈面如鐵一說未窮復一說勅  
 敵相扼已錚錚二豪同軍又連衡屏山直欲把降  
 旌不意人間有阿經阿經瓌竒天下士筆頭風雨  
 三千字醉倒謫仙元不死時借竒兵攻二子縱飲  
 高歌燕市中相視一笑生春風人憎鬼妒愁天公  
 徑奪吾弟還遼東短周醉別默無語髯張亦作衝

冠怒阿經老淚如秋雨只有屏山拔劍舞拔劍舞  
 擊劍歌人非麋鹿將如何秋天萬里一明月西風  
 吹夢飛關河此心耿耿軒轅鏡底用兒女肩相摩  
 有智無智三十里眉睫之間見吾弟

張謂伯玉  
周謂晦之

為蟬解嘲

獻臣伯玉  
不平蟬解

老蜨破衲染塵緇轉丸如轉造物兒道在矢溺傳  
 有之定中幻出婢娟姿金仙未解羽人尸吸風飲  
 露巢一枝倚杖而吟如惠施字字皆以心為師千

得瀾翻無了時關捷不落詩人詩屏山叅透此一  
 機鼻弟皤兄何見疑此理入玄人得知鼻弟恐我  
 食却西山秀張有登樓詩昨日上高樓西山翡翠  
 山老療飢西山隈食却堆今日上高樓西山如死灰想見屏  
 西山色高樓空崔嵬有皤兄勸我吸却壺盧溪高  
 壺溪詩我觀壺盧溪未易以蠡測以若溪上翁有  
 口吸不得壺中別是一洞天溪上翁即壺中仙畢  
 竟人間無著處杖頭地取屏山去  
 因蟬倩我問渠伊快掉葛藤復  
 是誰鼻弟絕倒皤兄嘻

灞陵風雪

君不見浣花老人醉歸圖熊兒投轡驥子扶又不  
 見玉川先生一絕句健倒莓苔三四五寒驢駝著  
 盡詩仙短策長鞭似有緣政在灞陵風雪裏管是  
 襄陽孟浩然官家放歸殊不惡寒爐大勝揚州鶴  
 莫愛東華門外軟紅塵席帽烏鞞老却人

贈高仲常

借問高書記南征又北征從軍元自樂遊子若爲  
 情筆下三千牘胸中百萬兵傷弓良小怯彈鋏竟

何成慘淡風塵際悲涼鼓角聲別家四十日並塞  
 兩三程斗絕牛皮嶺荒寒燕賜城吟邊白鳥沒醉  
 裏算雲橫感槩悲王粲真狂笑禰衡虎賁多將種  
 底用兩書生

真味堂

問渠真味若爲言不著鹽梅也自全龜鼎大夫徒  
 染指翹車公子漫流涎胸中已有五千卷徽外更  
 聽三兩絃此老清饒何所嗜宦名嚼蠟已多年

画兔

三窟言何鄙中林計未疎貧而長衣褐老矣不中  
 書搗藥元無死忘蹄始見渠子皮今尚在遺像豈  
 陶朱

猫飲酒

枯腸痛飲如犀首竒骨當封似虎頭嘗笑廟謀空  
 食肉何如天隱且糟丘書生幸免翻盆惱老婢仍  
 無觸鼎憂只向北門長卧護也應消得醉鄉侯

天游齋

丈人未始出吾宗  
草靡波流盡太冲  
七竅鑿開無混沌  
六根消落盡圓通  
法身兔角聲聞外  
塵事牛毛夢幻中  
誰會天游更端的  
瘦梅疎竹一窗風

孫卿子

諸儒談性盡  
婦情誰信黃河徹底清  
未到崑崙源上見  
且休容易小荀卿

謝安石

阿堅休道不英雄  
兒輩成蓋世功  
屐齒折時渠自省  
至今人解笑桓冲

魏徵

健兒搖足據山東  
李氏家居太半空  
貞觀力排封建議  
魏徵元只是田公

老蘇

宋季人憂大瓠穿  
敢留金幣不輸邊  
權書更信蘇家策  
剩費青苗幾倍錢



偶得

已裹青衫已十年  
聰明更覺不如前  
簿書叢裏先  
抽手鼓笛場中少  
息肩甌底剩儲元  
亮粟叉頭高  
挂老坡錢會須著  
我屏山下了却  
平生不問天

雜詩六首

顛倒三生夢飛沈  
萬劫心乾坤頭至  
踵混沌古猶  
今黑白無真色  
宮商豈至音  
維摩懶開口  
枝上一  
蟬吟

又

乾坤大聚落  
今古小朝昏  
諸子蠅鑽紙  
群雉虱處  
禪一心還入道  
萬物自歸根  
却笑幽憂客  
空招楚  
些鬼

又

丹鳳翔金鼎  
蒼龍戲玉池  
心源澄似水  
鼻息細於  
絲  
恍上山川好  
壺中日月遲  
神仙學道者  
那許小  
兒知

空譯流沙語難叅少室禪泥牛耕海底玉犬吠雲  
邊仰嶠圓茶夢曹山放酒顛書生眼如月休被納  
僧穿

又

狡兔留三窟獼猴戲六窗情田鋤宿草心月印澄  
江酒戒何曾破詩魔先已降雄蜂雌蛺蝶正自不  
成雙

又

道義富無敵詩書貴不貲浮生幾兩屐狂樂一絢  
絲豪俠非吾友臞儒即我師誰知茅屋底元自有  
男兒

趙宜之愚軒

昇窮射殺金畢逋老盧磔殺玉蟾蜍朝夕相避崑  
崙墟忽見天公一目枯塵昏土昧萬萬古雲昏雨  
淚寒模糊嗟哉區中人么麼如蚍蜉書生不惜兩

曠子長使看書如老奴水部一奇士西河君子儒  
二公正坐詩作崇得句令人不敢書先生有膽乃  
許大落筆突兀無黃初軒昂學古落家法出關睢  
暗中摸索出奇語字字不減瓊瑤琚神憎鬼妒天  
公且戲將片雲翳玄珠九竅鑿開混沌死罔象未  
必輸離朱靜埽空花萬病除一片古心含太虛屏  
山有眼不如無安得恰似愚軒愚安得恰似愚軒  
愚

子端山水同裕之賦

遼鶴歸來萬事空人間無地著詩翁只留海岳樓  
中景長在經營慘淡中

馬圖同裕之賦

韓筆定襄霍  
益之家物

天馬飛來不苦難雲屯萬騎開元間太平有象韓  
生筆曾見真龍如此關

瓢庵

書生只合飽黃齏大嚼屠門計似癡壁上七絃元

自雅囊中五字更須奇橫陳已覺如嚼蠟皆醉何  
妨獨啜醑此味欲談舌本強如人飲水只渠知

劉宋

六十衰翁五打圍深山赤手搏熊罴子孫只解相  
魚肉辛苦知他爲阿誰

哭黃華

士價五羊皮人生黍一炊蓋棺那可忍挂劍不勝  
悲向上誰曾到而今渠得知侍臣傷立本老姥怒

義之作病無如酒窮愁坐詩中郎猶有女少傅  
竟無兒散落真行帖飄零騷雅辭儒林頓憔悴未  
敢哭吾私

怪松謠

阿誰栽汝來幾時輪囷擁腫蒼虬姿鱗皴百恠確  
牙鬚擎空夭矯蟠枯枝疑是祕魔巖中老慵物早  
火燒天鞭不出睡中失却照海珠羞入黃泉蛻其  
骨石鉗沙錮汗且僵埋頭卧角政摧歲試與摩挲

定何似怒我長觸鬚鬚張壯士囚縛不得住神物  
世間無著處隄防夜半雷破山尾血淋漓飛却去

虞舜卿送橙酒

屏山持律不作詩硯塵筆禿縈蛛絲枯腸燥吻思  
憂憂法當以酒疏淪之何物替郵風味惡長觸閒  
愁無處著苦思新釀橙香世間那有揚州鶴乞  
詩送酒並柴門瀛洲仙裔令公孫肺腸憤痒芒角  
出傾瀉長句如翻盆怪江胸中雲夢大老我眼皮

危塞破徑呼短李與黔不快取錦囊收玉唾

士欽叔  
衡



中州集纂叢終

程